

গল্প



হেমাপ্যাথি, এ্যালাপ্যাথি হাসান আজিজুল হক

গল্পটির মূলভাব

এ গল্পে লেখক সরস ভাষায় গ্রাম্য দুজন হাতুড়ে ডাক্তারের প্রতিদ্বন্দ্বিতার কথা বলেছেন। হোমিওপ্যাথ ডাক্তারের নাম ছিল অঘোর এবং এ্যালোপ্যাথ ডাক্তারের নাম ছিল তোরাপ। ম্যালেরিয়ার প্রকোপে গ্রামের ছেলেবুড়ো সকলে কাতর হলে তোরাপের আয় রোজগারের সুবিধা হতো; আর অঘোর ডাক্তারের কাছে কেউ যেতই না। রোগীর অভাবে অঘোর ডাক্তারের সংসার চলাই দায় হয়ে উঠল। তাই অঘোর ডাক্তার একদিন গোপনে বাজার থেকে সিরিঞ্জ আর কুইনাইন ইনজেকশন কিনে এনে এ্যালোপ্যাথি চিকিৎসা শুরুর চেষ্টা করলেন। অঘোর ডাক্তার কাঁপা কাঁপা হাতে ইদরিস নামের এক রোগীর কোমরের গভীর মাংসে সিরিঞ্জের সূচ ঢুকিয়ে দিতে গিয়ে সূচটা ভেঙে ফেললেন। ওই সময়ে একটি বুদ্ধিমান ছেলে বিষয়টার ভয়াবহ পরিণতি আঁচ করতে পেরে সঙ্গে সঙ্গে দাঁত দিয়ে সূচটা বের করে নেয়। লজ্জা, ক্ষোভ, দুঃখ, অপমান ও অভিমানে অঘোর ডাক্তারের চোখে অশ্রু ঝরে। তিনি নিজের ভুলটা বুঝতে পারলেন। যার যেটা কাজ সেটাই করা উচিত, নয়তো দুঃখ ও অপমান বয়ে বেড়াতে হয়; গল্পটিতে এ ভাবই প্রতিফলিত হয়েছে।



গল্পটির শিখনফল : গল্পটি অনুশীলন করে আমি—

- শিখনফল-১ : গ্রামের মানুষের অজ্ঞতা সম্পর্কে জানতে পারব।
- শিখনফল-২ : সচেতন হতে শিখব।
- শিখনফল-৩ : অসুস্থ হলে সঠিক চিকিৎসা করাব।
- শিখনফল-৪ : অসুস্থ ব্যক্তির কষ্ট বুঝতে পারব।

লেখক-পরিচিতি

নাম : হাসান আজিজুল হক।

জন্ম : ১৯৩৯ খ্রিস্টাব্দ। জন্মস্থান : পশ্চিমবঙ্গের বর্ধমান জেলার যবগ্রাম।

সাহিত্য সাধনা : গল্পগ্রন্থ : আত্মজা ও একটি করবী গাছ, জীবন ঘষে আগুন। উপন্যাস : আগুনপাখি, সাবিত্রী উপাখ্যান।

শিশুসাহিত্য : লালঘোড়া আমি, ফুটবল থেকে সাবধান।

পুরস্কার/সম্মাননা : বাংলা একাডেমি পুরস্কার, একুশে ও স্বাধীনতা পদক।

মৃত্যু : ২০২১ খ্রিস্টাব্দ।



অনুশীলন



মূল্যায়ন পদ্ধতির সঠিক ফরম্যাট অনুসরণে
১০০% প্রস্তুতি উপযোগী প্রশ্ন ও উত্তর

প্রিয় শিক্ষার্থী, NCTB প্রদত্ত চূড়ান্ত নথর বটন অনুযায়ী অর্ধ-বার্ষিক ও বার্ষিক পরীক্ষায় আনন্দপাঠ অংশ থেকে বর্ণনামূলক প্রশ্ন থাকবে। মাস্টার ট্রেনার প্রণীত গুরুত্বপূর্ণ বর্ণনামূলক প্রশ্ন ও উত্তরসমূহ নিচে সংযোজিত হলো। পরীক্ষায় ভালো ফলাফলের জন্য প্রয়োজনগুলো বুঝে প্র্যাকটিস কর।

গুরুত্বপূর্ণ বর্ণনামূলক প্রশ্ন ও উত্তর



বিষয়বস্তুর ধারায় উপস্থাপিত □ □ □ □ □ □ □ □

বর্ণনামূলক প্রশ্ন ০১

- ক. অঘোর ডাক্তার চুপি চুপি জেলা শহরে গিয়েছিলেন কেন? ৩
- খ. 'হেমাপ্যাথি, এ্যালাপ্যাথি' গল্প অবলম্বনে গ্রামীণ হাতুড়ে ডাক্তারের চিকিৎসা পদ্ধতির বর্ণনা দাও। ৭

১নং প্রশ্নের উত্তর

ক. গ্রামের হোমিওপ্যাথ ডাক্তার ছিলেন অঘোর। তার কাছে কোনো রোগী গেলেই তিনি একটুখানি সাদা ময়দার মতো গুঁড়োতে দু-তিন ফোটা স্পিরিট টপ টপ করে ফেলে পুরিয়া করে দিতেন। তবে ম্যালেরিয়া রোগীরা তার কাছে যেত না। তারা ভিড় জমাত এ্যালোপ্যাথ ডাক্তার তোরাপের কাছে। সেবার প্রায় পুরো গ্রাম

ম্যালেরিয়ায় আক্রান্ত হলে তোরাপ ডাক্তার দুহাতে টাকা আয় করেন কিন্তু অঘোর ডাক্তার হয়ে পড়েন কর্মহীন। তিনি মনে মনে সিদ্ধান্ত নেন এ্যালোপ্যাথি চর্চা করার। তাই তিনি একটা সিরিঞ্জ আর কিছু কুইনাইন ইজেকশন কেনার জন্য চুপিচুপি জেলা শহরে গিয়েছিলেন।

খ. গ্রামীণ হাতুড়ে ডাক্তার বলতে মূলত সেসব ডাক্তারকে বোঝায় যারা প্রথাগত ডাক্তারি শিক্ষার বাইরে থেকে সাধারণ চিকিৎসা দেন। তারা মূলত গ্রামাঞ্চলে চিকিৎসাসেবার ঘাটতি পূরণের জন্য কাজ করে থাকেন। 'হেমাপ্যাথি, এ্যালাপ্যাথি' গল্পে অঘোর ও তোরাপ হচ্ছেন সেই শ্রেণির ব্যক্তি। অঘোর ও তোরাপ ডাক্তারের মতো হাতুড়ে ডাক্তারের কাছে অনেক সময় মানুষ উপকৃত হলেও কিছু কিছু ক্ষেত্রে তাদের চিকিৎসায় মারাত্মক ক্ষতি হয়ে যায়।

'হেমাপ্যাথি, এ্যালোপ্যাথি' গল্পে দুজন চিকিৎসক অঘোর ডাক্তার ও তোরাপ ডাক্তার। অঘোর চর্চা করেন হোমিওপ্যাথ আর তোরাপ চর্চা করেন এ্যালোপ্যাথ। গ্রামের মানুষের সংকটকালে তাদের একমাত্র ভরসা এই দুই ডাক্তার। মূলত গ্রামীণ অঞ্চল শহর থেকে দূরে অবস্থিত হওয়ার কারণে অনেক কিছুই মানসম্মত হয়ে ওঠে না। বর্তমান সময়েও লক্ষ করা যায় গ্রামে এখনো আধুনিক মানসম্মত চিকিৎসাসেবা পৌঁছেনি। তাই তাদের ভরসা রাখতে হয় হাতুড়ে ডাক্তারের ওপর। এ গল্পের দুজন ডাক্তারের চিকিৎসা পদ্ধতির দিকে তাকালেই গ্রামীণ হাতুড়ে ডাক্তারের চিকিৎসা পদ্ধতি স্পষ্ট হয়ে ওঠে। হোমিওপ্যাথ অঘোর ডাক্তারের কাছে যেকোনো রোগী এলেই সাদা ময়দার মতো গুড়োতে দু-তিন ফোঁটা স্পিরিট মিশিয়ে দিয়ে দেয়। সর্বরোগের একই ওষুধ। তোরাপ ডাক্তারও এক সিরিঞ্জ দিয়েই পুরো গ্রামকে চিকিৎসাসেবা দিয়ে যাচ্ছেন। তার ইঞ্জেকশনের বর্ণনায় লেখক জানিয়েছেন, ইঞ্জেকশন দিয়ে তিনি দুতিনটে লোককে চিরদিনের জন্য খোঁড়া করে ফেললেন। আর তার ম্যাপাক্রিন বড়ি খেয়ে কয়েকজন তো চিরকালের জন্য কালা হয়ে গেল। তবু মানুষ তার কাছেই যায়। কারণ গ্রামীণ প্রত্যন্ত এলাকায় অন্য কোনো উপায় থাকে না মানুষের কাছে।

তাই বলা যায়, গ্রামীণ অঞ্চলে উন্নত চিকিৎসাব্যবস্থা নিশ্চিত করতে না পারলে গ্রামের মানুষদের অদক্ষ হাতুড়ে ডাক্তার ছাড়া অন্য কোনো উপায় থাকবে না। তবে অঘোর ডাক্তার ও তোরাপ ডাক্তারের মতো হাতুড়ে ডাক্তাররা কিছু ক্ষেত্রে মানুষের জন্য সহায়ক হলেও তাদের চিকিৎসা বিজ্ঞানসম্মত না হওয়ার কারণে অনেক মানুষের বড় ধরনের ক্ষতি হয়ে যায়। যার মূল্য কোনোভাবেই শোধ করা যায় না।

বর্ণনামূলক প্রশ্ন ০২

ক. ম্যালেরিয়া জ্বরকে বাঘের সঙ্গে তুলনা করা হয়েছে কেন? ৩

খ. এ্যালোপ্যাথ ডাক্তার তোরাপের ম্যালেরিয়া চিকিৎসা কেমন ছিল? ৭

২নং প্রশ্নের উত্তর

ক. 'হেমাপ্যাথি, এ্যালোপ্যাথি' গল্পটিতে দেখা যায়, কৃষিপ্রধান এই দেশে বর্ষা ও শীত হচ্ছে কাজের মৌসুম। এ সময়ে অসুস্থ হয়ে শুয়ে থাকার সময় মানুষের নেই। কিন্তু তারপরেই শরৎকালে একটু অবসরে থাকে মানুষ। ওই সময়ের জন্যই যেন ওত পেতে বসে থাকে ম্যালেরিয়া জ্বর। আশ্বিন মাসের দিকে ম্যালেরিয়ার প্রকোপে মানুষ ঘরে ঘরে ছেঁড়া কাঁথা, ন্যাকড়া, তান্না গায়ে চাপিয়ে কোঁকাত। আর সে কী কাঁপুনি! সে সময়ে ম্যালেরিয়ার মতো বাঘা জ্বর আর কিছু ছিল না। বাঘ যেমন গুটিগুটি পায়ে এগিয়ে গিয়ে হঠাৎ লাফ দিয়ে কাঁপিয়ে পড়ে শিকারের টুটি কামড়ে ধরে, ঠিক তেমনি ম্যালেরিয়া জ্বর এসে গ্রামের মানুষের ওপর কাঁপিয়ে পড়ত। হঠাৎ করেই অনেক বেশি ম্যালেরিয়া জ্বরের প্রভাব হতো বলে এই জ্বরকে বাঘের সঙ্গে তুলনা করা হয়েছে।

খ. 'হেমাপ্যাথি, এ্যালোপ্যাথি' গল্পে দেখা যায়, শরৎকালে যখন বেশ ঝরঝরে আবহাওয়া, আকাশ ভর্তি রোদ, একটু একটু ঠান্ডা হাওয়া বইতে শুরু করে ঠিক তখনই হুড়মুড়িয়ে চলে আসে ম্যালেরিয়া জ্বর। জ্বরের প্রভাবে গ্রামের প্রায় অনেক মানুষ আক্রান্ত হয়ে পড়ে। আর তাদের চিকিৎসার জন্য একমাত্র ভরসা ছিলেন এ্যালোপ্যাথ ডাক্তার তোরাপ।

লেখকের গ্রামে ত্রিশ-পঁয়ত্রিশ বছর আগে যে দুজন ডাক্তার ছিলেন তাদের মধ্যে একজন হচ্ছেন তোরাপ ডাক্তার। তিনি এ্যালোপ্যাথ চর্চা করেন। গ্রামের দুই হাতুড়ে ডাক্তার তোরাপ ও অঘোরের মধ্যে প্রতিযোগিতায় সব সময় তোরাপ ডাক্তারই এগিয়ে থাকেন। কারণ গ্রামে প্রধানত প্রাদুর্ভাব ঘটে ম্যালেরিয়া জ্বরের। ম্যালেরিয়ার মতো বাঘা জ্বর অঘোর ডাক্তারের হোমিওপ্যাথ চিকিৎসায় সারানো সম্ভব নয়। তাই একমাত্র ভরসা তোরাপ ডাক্তার। সেবার শরৎকালে গ্রামের প্রায় অর্ধেক লোক ম্যালেরিয়া জ্বরে পড়লে ব্যস্ততা বাড়ে তোরাপ ডাক্তারের। তোরাপ ডাক্তার হলুদ রঙের বড় বড় বিকট দাঁত বের করে, একটি বড় সিরিঞ্জ নিয়ে রোগীদের বাড়ি বাড়ি ঘুরতেন। তার সঙ্গে থাকত দুই প্যাকেট ভর্তি ম্যাপাক্রিন বড়ি। রোগী যেখানেই থাকুক না কেন, গলায় স্টেথোটি বুলিয়ে ইনজেকশনের বাত্মটি হাতে নিয়ে

তোরাপ ডাক্তার হাজির হয়ে যেতেন। রোগীর কাছে গিয়েই তিনি তার গোদা গোদা এ্যাকাব্যাকা আঙুল দিয়ে রোগীর কজি চেপে ধরে কিছুক্ষণ নাড়ি পরীক্ষা করতেন। তারপর ইনজেকশন দিয়ে ম্যালেরিয়ার ভূত ছাড়াতে চাইতেন। ডাক্তারি ফি এবং ওষুধের খরচ বাবদ দুই টাকা পকেটে ভরে মহিষের লাঙলের ফলার মতো প্রকাণ্ড সিরিঞ্জ দিয়ে ইঞ্জেকশন করতেন। অদক্ষ ও অনভিজ্ঞ তোরাপ ডাক্তারের ইঞ্জেকশনে অনেকে চিরদিনের জন্য খোঁড়া হয়ে যায় এবং ম্যাপাক্রিন বড়ি খেয়ে অনেকে চিরদিনের জন্য কালা হয়ে যায়। এই ছিল এ্যালোপ্যাথ ডাক্তার তোরাপের ম্যালেরিয়া চিকিৎসা।

তাই বলা যায়, হাতুড়ে ডাক্তার তোরাপের চিকিৎসা ছিল অনুমাননির্ভর। তার চিকিৎসায় অনেকে সেরে উঠলেও অনেকের জন্য তা মারাত্মক ক্ষতির কারণ হয়ে উঠেছিল।

বর্ণনামূলক প্রশ্ন ০৩

ক. বর্ষা ও শীতে তোরাপ ডাক্তারি করতে যান না কেন? ৩

খ. "যার যেটা কাজ সেটাই করা উচিত, নয়তো দুঃখ ও অপমান বয়ে বেড়াতে হয়।" 'হেমাপ্যাথি, এ্যালোপ্যাথি' গল্পের আলোকে আলোচনা কর। ৭

৩নং প্রশ্নের উত্তর

ক. 'হেমাপ্যাথি, এ্যালোপ্যাথি' গল্পে লেখকের গ্রামে যে দুজন ডাক্তার আছেন তাদের মধ্যে একজন হচ্ছেন এ্যালোপ্যাথ ডাক্তার তোরাপ। পেশায় তিনি একজন ডাক্তার হলেও মূলত মৌসুম বুঝে ডাক্তারি করেন। বাকি সময় নিজ হাতে হালচাষ করেন। বর্ষাকাল হচ্ছে চাষবাসের সময় এবং শীতকাল হচ্ছে ফসল কাটার মৌসুম। এ সময় গ্রামের সব মানুষ রোগটোগ শিকেয় তুলে রেখে মাঠে নেমে পড়ত। কারণ এই দুই সময়ে কাজ করতে না পারলে পেটে ভাত জুটবে না। এ সময় রোগী হয়ে শুয়ে থাকার উপায় নেই। কাজেই এ সময়টাতে তোরাপ ডাক্তার ডাক্তারি পেশা শিকেয় তুলে রেখে কৃষিকাজে নেমে পড়তেন। এ সময় তিনি ডাক্তারি ধার ধারতেন না। মূলত কৃষিকাজ করার জন্যই কৃষি মৌসুম বর্ষাকাল ও শীতকালে তোরাপ ডাক্তার ডাক্তারি করতে যান না।

খ. বাংলায় একটা প্রবাদ আছে— "যার কাজ তারই সাজে, তনা লোকের লাঠি বাজে।" অর্থাৎ যার যেটা কাজ তার সেটাই করা উচিত। না হলে অন্যের কাজ করতে গেলে অহেতুক উপহাসের পাত্র হয়ে দুঃখ ও অপমান বয়ে বেড়াতে হয়। 'হেমাপ্যাথি, এ্যালোপ্যাথি' গল্পে হোমিওপ্যাথ ডাক্তার অঘোর এ্যালোপ্যাথ চিকিৎসা করতে গিয়ে দুঃখ ও অপমানকে সঙ্গী করেছেন।

'হেমাপ্যাথি, এ্যালোপ্যাথি' গল্পে দেখা যায়, গ্রামের অর্ধেকের বেশি মানুষ ম্যালেরিয়া জ্বরে আক্রান্ত। তাদের চিকিৎসা করে দুহাতে মোটা টাকা রোজগার করে নিচ্ছেন এ্যালোপ্যাথ ডাক্তার তোরাপ। ম্যালেরিয়া জ্বরে হোমিওপ্যাথ কাজ করে না বলে হোমিওপ্যাথ ডাক্তার অঘোরের কাছে কোনো রোগী যায় না। তোরাপ ডাক্তারের যেখানে আঙুল ফুলে কলাগাছ সেখানে অঘোর ডাক্তারের সংসার চালানো দায় হয়ে পড়ে। এ অবস্থায় অঘোর ডাক্তার সিদ্ধান্ত নেন তিনিও এ্যালোপ্যাথ চিকিৎসা দেবেন। তাই তিনি চুপি চুপি জেলা শহরে গিয়ে একটা সিরিঞ্জ আর কিছু কুইনাইন ইঞ্জেকশন কিনে আনেন। তোরাপের সঙ্গে প্রতিদ্বন্দ্বিতা করে তিনি এগিয়ে থাকতে চান। এবার থেকে তিনিও এ্যালোপ্যাথ চিকিৎসায় ইঞ্জেকশন দেবেন। তার কাছে প্রথম রোগী আসে ইদরিস। সে ইঞ্জেকশনের ভয়ে অঘোর ডাক্তারের হোমিওপ্যাথ চিকিৎসাতেই ভরসা রেখেছে। অদক্ষ ডাক্তার অঘোর কখনো ইঞ্জেকশন করেননি। কিন্তু তিনি হার মানতে নারাজ। তাই তিনি মনের জোরে কাঁপা কাঁপা হাতে ইদরিসের কোমরের মাংসে সুচ ঢুকিয়ে দেন। কিন্তু সুচটা ভেঙে যায় আনাড়ি ডাক্তারের অদক্ষতার কারণে। সেই সময়ে একজন বুদ্ধিমান ছেলে পরিস্থিতির ভয়াবহতা আন্দাজ করতে পেরে দাঁত দিয়ে সুচটা বের করে নেয়। লজ্জা, দুঃখ ও অপমানে অঘোর ডাক্তারের দুচোখে অশ্রুর ঢল নামলেও শেষ পর্যন্ত তিনি নিজের ভুল বুঝতে পারেন।

সুতরাং বলা যায়, “চাষির চাষ দেখে চাষ করল গোয়াল, ধানের সঙ্গে খোজ নেই রাশি রাশি পোয়াল।”— এই অবস্থা হয়েছে অঘোর ডাক্তারের। কাজ জানা না থাকলে আগ বাড়িয়ে অন্যের কাজ করতে যাওয়া উচিত নয়। নিজের কাজ না করে অন্যের কাজ করতে গেলে অঘোর ডাক্তারের মতো দুঃখ ও অপমান বয়ে বেড়াতে হবে।

বর্ণনামূলক প্রশ্ন ০৪

- ক. ম্যালেরিয়া রোগীর অবস্থা কেমন হয়ে থাকে? ৩
খ. ‘হেমাপ্যাথি, এ্যালোপ্যাথি’ গল্পের মূলভাব আলোচনা কর। ৭

৪নং প্রশ্নের উত্তর

ক. ‘হেমাপ্যাথি, এ্যালোপ্যাথি’ গল্পে ম্যালেরিয়া জ্বরের প্রাদুর্ভাবের কথা ফুটে উঠেছে। একটা সময় ছিল যখন ম্যালেরিয়া জ্বরের প্রভাবে নিশ্চিহ্ন হয়ে যেত গ্রামের পর গ্রাম। ম্যালেরিয়া জ্বরের প্রাদুর্ভাব শুরু হয় মূলত শরৎকালে। ম্যালেরিয়া জ্বরের মতো মারাত্মক জ্বর তখন আর কিছু ছিল না। ঘরে ঘরে মানুষ ছেঁড়া কাঁথা, ন্যাকড়া, তানা গায়ে চাপিয়ে কোঁকাত। কাঁপুনি থামানোর জন্য অনেকে গায়ে পাথর পর্যন্ত চাপিয়ে রাখত। যখন ম্যালেরিয়া শুরু হয় তখন মানুষ দমাদম বিছানা ধরতে লাগে। ছেলে-বুড়ো কেউ বাদ যায় না। পুরোনো রোগীদের বেলা বাড়ার সঙ্গে সঙ্গে জ্বর বাড়তে থাকে। সঙ্গে বাড়ে পিপাসা। ঘটি ঘটি পানি খেয়ে পিপাসা কমে না। পানি পেটে গিয়ে গরম হয়ে যায়, তারপর গা-টা গুলিয়ে ওঠে। তারপরেই বমি। বমি হয়ে গেলেই আবার পিপাসা। জ্বর কমে আসে আস্তে আস্তে। রাত দশটার দিকে একদম জ্বর চলে গিয়ে গা ঠান্ডা হয়। সব মিলিয়ে ম্যালেরিয়া রোগীর অবস্থা থাকে অত্যন্ত শোচনীয়।

খ. ‘হেমাপ্যাথি, এ্যালোপ্যাথি’ গল্পে গল্পকার হাসান আজিজুল হক গ্রামীণ পটভূমিতে এক গ্রামীণ বাস্তবতাকে তুলে ধরেছেন সহজ-সরল ও সাবলীল ভাষায়।

গল্পে দেখা যায়, লেখক সরস ভাষায় গ্রাম্য দুজন হাতুড়ে ডাক্তারের প্রতিদ্বন্দ্বিতার কথা তুলে ধরেছেন। যিনি হোমিওপ্যাথ চিকিৎসা করতেন তার নাম ছিল অঘোর, আর এ্যালোপ্যাথ ডাক্তারের নাম ছিল তোরাপ। শরৎকালে গ্রামে ম্যালেরিয়ার প্রভাব বৃদ্ধি পেলে এ্যালোপ্যাথ ডাক্তার তোরাপের আয়-রোজগারের সুবিধা হতো। অন্যদিকে একই সময়ে রোগীর অভাবে অঘোর ডাক্তারের সংসার চালানো দায় হয়ে ওঠে। তাই অঘোর ডাক্তার একদিন গোপনে জেলা শহরে গিয়ে সিরিজ আর কুইনাইন ইঞ্জেকশন কিনে এনে এ্যালোপ্যাথি চিকিৎসা শুরু করার চেষ্টা করেন। এই চেষ্টার প্রথম প্রচেষ্টায় অঘোর ডাক্তার কাঁপা কাঁপা হাতে ইদরিস নামের এক রোগীর কোমরের গভীর মাংসে সিরিজের সুচ ঢুকিয়ে দিতে গিয়ে সুচটা ভেঙে ফেলেন। ওই সময়ে গ্রামের এক বুদ্ধিমান ছেলে বিষয়টির ভয়াবহ পরিণতি আঁচ করতে পেরে সঙ্গে সঙ্গে দাঁত দিয়ে সুচটা বের করে আনে। এ সময় লজ্জা, ক্ষোভ, দুঃখ, অপমান ও অভিমানে অঘোর ডাক্তারের চোখে অশ্রুর ঢল নেমে আসে। একটা মারাত্মক ভুল করে অঘোর ডাক্তার নিজের সিদ্ধান্তের ভুলটা বুঝতে পারেন।

মূলত যার যেটা কাজ তার সেটাই করা উচিত। নয়তো দুঃখ ও অপমান বয়ে বেড়াতে হয়। গল্পটিতে এ ভাবই তুলে ধরেছেন লেখক।

বর্ণনামূলক প্রশ্ন ০৫

- ক. কোন কোন সময় গ্রামে রোগের প্রকোপ বেশি ছিল? ব্যাখ্যা কর। ৩
খ. হোমিওপ্যাথ ডাক্তার অঘোর ও এ্যালোপ্যাথ ডাক্তার তোরাপের চিকিৎসা পদ্ধতির তুলনামূলক আলোচনা কর। ৭

৫নং প্রশ্নের উত্তর

ক. বর্ষা আর শীতকালে গাঁয়ের লোকদের রোগী হয়ে শুয়ে থাকার কোনো উপায় ছিল না। এই দুই সময়ে গ্রামের প্রায় সবাই ফসলের কাজে ব্যস্ত থাকত। তারপর শরৎকাল এলে তোরাপ ডাক্তারের মোটামুটি অবসর হতো আর গাঁয়ের লোকদেরও রোগী হয়ে শুয়ে থাকার একটু আধটু সুযোগ হতো। আর সেই সময়টাতে যেন

ম্যালেরিয়া জ্বর ওত পেতে থাকত। এই জ্বরকে বাঘের সঙ্গে তুলনা করা হয়েছে। বাঘ যেমন গুটিগুটি পায়ে এগিয়ে গিয়ে হঠাৎ লাফ দিয়ে ঝাঁপিয়ে পড়ে শিকারের টুটি কামড়ে ধরে, ঠিক তেমনি ম্যালেরিয়া জ্বর এসে গাঁয়ের গরিব লোকদের ওপর ঝাঁপিয়ে পড়ত। এটা ঘটত আশ্বিন মাস থেকে। তখন ঘরে ঘরে মানুষ ছেঁড়া কাঁথা, ন্যাকড়া, তানা গায়ে চাপিয়ে কোঁকাত আর কাঁপত। তাদের কাঁপুনি থামানোর জন্য পাথরের জাঁতা পর্যন্ত গায়ে চাপাতে হতো। রোগের আরেকটা সময় ছিল চৈত্র-বৈশাখ মাস। সেই সময়টায় কলেরা আর বসন্ত হয়ে গ্রামের পর গ্রাম সাফ হয়ে যেত।

খ. হোমিওপ্যাথ ডাক্তার অঘোরকে গাঁয়ের লোকজন বলত হেমাপ্যাথি আর এ্যালোপ্যাথ ডাক্তার তোরাপকে বলত এ্যালোপ্যাথি ডাক্তার। তাদের দুজনের চিকিৎসার ধরন ছিল বাঁধা।

হোমিওপ্যাথ অঘোর ডাক্তারের কাছে গেলেই একটুখানি সাদা ময়দার মতো গুঁড়োতে দু-তিন ফোঁটা স্পিরিট টপ টপ ফেলে তিন-চারটি পুরিয়া করে দিতেন। তার এমন ওষুধ খেতে ভালোও লাগত না, মন্দও লাগত না। কখনো কখনো তিনি আবার শুধু টিউবওয়েলের পানিতে দু-তিন ফোঁটা স্পিরিট মিশিয়ে দিয়ে রোগীকে খাওয়ার জন্য আদেশ করতেন। কোনো রোগী যখন রোগ ভালো হবে কি না তা জিজ্ঞেস করতেন, তখন তিনি দাঁত-মুখ খিঁচিয়ে বলে উঠতেন, ভালো তো হবেই, ভালো হয়ে আবার উপচে পড়বে। এভাবেই তিনি নিজের চিকিৎসা পদ্ধতির মাধ্যমে যেকোনো রোগীর চিকিৎসা করতেন। তার মতে বাঘ যেমন ভেড়ার পাল তাড়িয়ে নিয়ে যায় ঠিক তেমনি করে একটি পুরিয়ার তার ওষুধ রোগীর আঙুলের ডগা থেকে জীবাণু বাবাজিদের খেদাতে খেদাতে মাথার চুলের ডগা দিয়ে বের করে দেয়। জ্বর হলে, সর্দি হলে, বেশি খেয়ে বা অখাদ্য-কুখাদ্য খেয়ে পেট ছেঁড়ে দিলে লোকজন অঘোর ডাক্তারের কাছে যেত। আনা দুই পয়সা দিলেই তিনি দিয়ে দিতেন দুই-তিন পুরিয়া ওষুধ। পয়সা দিতে না পারলে ধারেও দিতেন। এমনকি একটা লাউ বা দুটো শশা নিয়ে গেলেও দিতেন।

আর অন্যদিকে এ্যালোপ্যাথ ডাক্তার তোরাপ ছিলেন অঘোর ডাক্তার থেকে কিছুটা জনপ্রিয়। কী করে যে তিনি ডাক্তার হয়েছিলেন কেউ তা জানত না। শোনা যায়, বাল্যকালে তিনি নাকি এক বুড়ো ডাক্তারের হুকো সাফ করতেন। তোরাপের একটা ছোট্ট শেয়াল রঙের বেতো ঘোড়া ছিল। সেই ঘোড়াটি নিয়েই তিনি গাঁয়ে ঘুরে বেড়াতেন আর চিকিৎসা করতেন।

তোরাপ ডাক্তার শুধু ডাক্তারিই করতেন না। নিজের হাতে হালচাষও করতেন। তিনি শরৎকাল এলে অবসর পেতেন, আর গাঁয়ের লোকদেরও রোগী হয়ে শুয়ে থাকার একটু-আধটু সুযোগ তৈরি হতো। সেই সময়ে গাঁয়ে ম্যালেরিয়ার প্রকোপ দেখা দেয়। বিশেষ করে আশ্বিন মাস থেকে। তখন তোরাপ ডাক্তারের ব্যস্ততা বেড়ে যায়। কেননা ম্যালেরিয়া জ্বরে তোরাপ ডাক্তার ছাড়া অন্য কোনো গতি ছিল না। তিনি হলুদ রঙের বড় বড় বিকট দাঁত বের করে বড় সিরিজ নিয়ে রোগীদের বাড়ি বাড়ি ঘুরতে থাকেন। দুই পকেট ম্যাপাক্রিন বড়ি দিয়ে ভর্তি থাকে যেগুলো খুবই ভয়ানক বড়ি। রোগী যেখানেই থাক, সে মাটির দাওয়াতেই হোক, আর খোলা আকাশের নিচে উঠোনেই হোক বা ঘরের ভিতরেই হোক, গলায় স্টেখোটি ঝুলিয়ে ইঞ্জেকশনের বাস্তবতা হাতে নিয়ে তোরাপ ডাক্তার হাজির হয়ে যান। ঘরে ঢুকেই গোদা গোদা এ্যাকাব্যাকা আঙুল দিয়ে তোরাপ ডাক্তার রোগীর কজি চেপে ধরে কিছুক্ষণ নাড়ি পরীক্ষা করতেন। পরে রোগীর অসুখকে নিশ্চিত ম্যালেরিয়া জ্বর হিসেবে চিহ্নিত করে আশপাশের লোকদের আদেশ দিতেন রোগীকে চেপে ধরতে, তিনি তাকে ইঞ্জেকশন দেবেন। আর পাশে দুটো টাকা রাখতে বলতেন, তার ফি আর ওষুধের দাম হিসেবে। এই বলে তোরাপ ডাক্তার একদিকের পকেটে টাকা দুটো ভরতেন। আরেক পকেট থেকে বের করতেন ইঞ্জেকশন দেওয়ার সিরিজ। সেই ইঞ্জেকশন লোকের গায়ে ফুঁড়তে ফুঁড়তে সুচের মাথা ভোঁতা হয়ে গেছে যেটা দেখেই রোগী ভয় পেয়ে যেত। সেই ইঞ্জেকশন নিয়ে দু-তিনজন চিরদিনের জন্য খোঁড়া হয়, আর তাঁর ম্যাপাক্রিন বড়ি খেয়ে কয়েকজন চিরকালের জন্য কালা হয়ে যায়।